

## 2 Reyes

---

### Elías jácho'oko je'echú chojé yukuna marí

**2** <sup>1</sup>Kaja riphá rená chojé Elíasjlo, Tupana wá'akaloje riká rijwa'ató je'echú chojé kajruni karená chipúka'alo kaje e'iyowá. Ñaké ri'imaká rijló piyá, Elías jácho'oro Eliseo wa'até pajimila Guilgal eyá. <sup>2</sup>Meketánaja na'apaka rijwa'até, e rimá Eliséojlo:

—Maare piyuró, nuká ja'apájeri pajimila Betel ejo, rejo Tupana wakári'ichakale nu'ujnaká.

E'iyonaja Eliseo kemari rijló:

—Tupana íi a'akana aú numá pijló, ñakeja kaja numaká pijló rinaku pijimaya: unká nuyurílaje pi'ijnaká pikó rejo.

Raú na'apá rijwa'até pajñakani Betel ejo. <sup>3</sup>Tupana puráka'alo ja'apátajeño, rewá i'imakaño, jácho'oño Eliseo jimaje, nepháka'akoloje rijwa'até. Nephátaka riká ee, nemá rijló:

—¿E piwe'epika Tupana wá'ajika chuwayá piliyá pewíña'atajeri Elías?

—A'a, kaja nuwe'epí riká, i'imaniña kalé ajopánajlo riyukuna.

<sup>4</sup>Rejomi Elías kemari Eliséojlo:

—Maare piyuró, nuká ja'apájeri Jericó ejo, rejo Tupana wakári'ichakale nu'ujnaká.

E'iyonaja Eliseo kemari piño rijló, maapami ke rimaká rijló keja kaja:

—Tupana íi a'akana aú numá pijló, ñakeja kaja numaká pijló rinaku pijimaya: unká nuyurílaje pi'ijnaká pikó rejo.

Raú na'apá piño rijwa'até pajñakani Jericó ejo. <sup>5</sup>Ñakeja kaja Tupana puráka'alo ja'apátajeño, rewá i'imakaño, jácho'oko reyá, nepháka'akoloje Eliseo wa'até penaje. Nephaka rinaku ee, nemá rijló:

—¿E piwe'epika Tupana wá'ajika piliyá chuwayá pewíña'atajeri Elías?

—A'a, kaja nuwe'epí riká, i'imaniña kalé riyukuna ajopánajlo.



<sup>6</sup>E na'apá piño reyá, meketana i'imajemi Elías kemari piño rijló:

—Maare piyuró, nuká ja'apájeri Jordán ejo, rejo Tupana wakári'ichakale nu'ujnaká.

E'iyonaja Eliseo kemari piño rijló:

—Tupana íí a'akana aú numá pijló, ñaké kaja numaká pijló rinaku pijimaya: unká nuyurílaje pi'ijnaká pikó rejo.

Raú na'apá piño rijwa'até Jordán ejo.

<sup>7</sup>Cincuenta Tupana puráka'alo ja'apátajeño,

rewá i'imakaño, iphaño nanaku a'ajnáreje ke. Juká kemachi ne'emaká naliyá, e Elías, Eliseo wa'até iphaño juni Jordán turenaje. <sup>8</sup>Rejéchami Elías ka'aká rinakiyó ra'arumaká waphereni. Riká riphila'á palá, rejomi riña'á juni jimá raú. Raú juni tamáka'ataro paliyáaka, nakuwá'akaloje palá pa'anojo pitá, makajreni riwami i'imakare chuwá. <sup>9</sup>Nakuwá'aka riká ejomi, Elías kemari Eliséojlo:

—Chuwa pimá nojló: ¿Na piwata nula'aká pijló, nuyuríjika piká yámona?

Raú Eliseo kemari rijló:

—Nuwata pa'aká nojló péchují, nula'akáloje nakaje pila'ajika i'imajika ke kaja, richaje nula'akáloje piño nakaje ñaké kaja.

<sup>10</sup>—Unká wejápaja kalé, kele nakaje pikeja'a nuliyá —ke Elías kemaká rijló—. E'iyonaja kalé pi'imajika ee nowa'á, nócho'ojiko ejéchami ee, ri'imajé pijló pimíchaka nojló ke. Eyá unkájika ee pi'imá nowa'á, nócho'ojiko maare eyá wakajé, unká nakaje i'imalaje pijló, ilé pimíchaka nojló ke.

<sup>11</sup>Rejomi na'apá mana'ija pura'akajo nakú pajwa'atéchaka. E mana'í chiyó pe'iyowa ja'apaka, kawaruna chíra'akare kaje, iphari je'echú chiyá ne'emaká ejé. Kera'athani ke waja ramako kawaruna wa'até. Neká wa'até Elías jácho'oro kajruni karená chipúka'ala kaje e'iyowá, ají ke je'echú chojé. <sup>12</sup>Ilé ke Eliseo amaka aú rawíyo'o:

“¡Nora'apá, nora'apá, piká mejñátakeri palá wani Israel michú lakénami i'imajika!”

Ilé ke rácho'oñaaka ri'imaká. Riwakajé Eliseo amá ri'imaká kaja penaje marí eja'awá chu.

### **Eliseo yuriko Elías apumí chojé yukuna marí**

Kamu'ují Eliseo pechu i'imaká, Elías jácho'oñaakale ri'imaká. Akuwaná rijyio'otá ra'arumaká rinaku i'imakare. <sup>13</sup>Rejomi riwayo'ó Elías a'arumakami ja'akaro rinakiyá, ri'ijraká je'echú chojé yámona. Rejomi ripa'ó juni Jordán ejo, iphari riturenaje, re ritára'o meketánaja. <sup>14</sup>E rijña'á Elías a'arumakami, raú riña'á juni jimá, rimá: “¿Mere wawakára'ajeri, Elías pechu i'imakare chojé kaphí? ¿Mere riká?” Riña'aká ra'arumakami aú juni jimá ee, juni tamáka'atako piño rijló. Richuwá rikuwa'a juni pa'anojo pitá riwami chuwá. <sup>15</sup>Tupana puráka'alo ja'apátajeño, Jericó eyájena, amaka aú riká, nemá rinaku: “Péchuji i'imari Elías wa'até i'imaká, penájemija kaja me'etení Eliseo wa'até”. <sup>16</sup>Nemá rijló:

—Pamá, maare weká pijwa'até jápajeño keja. Re weká maare cincuenta, unká na piyá kalé kero'okaño weká, ñakele wemá pijló, piyuríkaloje we'ejnaká pewiña'atajeri kulaje. Apala Tupana Pechu ka'ajná wá'ari ri'imaká. Rejomi ka'ajná riyurí riká mapeja ipuré e'iyowá, apala riwami e'iyowá ka'ajná.

E'iyonaja rimá najló:

—Unká, unká na iwakára'alaje rikulaje.

<sup>17</sup>E'iyonaja unká nala'aló ujwí rijló kemakana nakú, riyuríkaloje ne'ejnaká rikulaje. Kaja ewaja riyurí ne'ejnaká, raú ne'ejná rikulaje. Weji ke kala ketana ne'emaká rikulákana nakú, unká mérowa nephátala riká. <sup>18</sup>Raú napa'ó Jericó ejo, Eliseo yuriko i'imaká ejo. Nephá rinaku, e nemá rijló:

—Unká wephátala riká.

—Kaja numá ijló i'imaká: i'ijnaniña rikulaje, ke.

### **Eliseo, eyá pajluwájaru Sunem eyájeru, ru'urí kele yukuna marí**

**4** <sup>8</sup>Eliseo ja'apari pajimila Sunem ewá. Riká pajimila e pajluwájaru inanaru ñakaré i'imá, kajrú liñéruteru ru'umaká. Ruká kemayo mawó Eliséojlo, ri'ijnakáloje rujwa'até ruñakaré ejo, rajñákaloje ra'ajnewá najwa'até. Riwakajé rajña re ra'ajnewá najwa'até. Rejomi ri'ijnajika rejo, kewá ra'apájikano rewá, rajñákaloje re ra'ajnewá najwa'até. <sup>9</sup>Rukaja kaja kemayo ruyajnajlo:

<sup>10</sup>—Nuwe'epí riká iphárino majó wachaje, Tupana wa'ateje riká. Ripuráka'alo ja'apátajeri kaja riká. Palani ka'ajná wala'aká rijló pajluwa ukapú maare wañakaré chu, riyuríkoloje richu, riphájika majó wachaje kewá. Wayureje rikapure chojé pajluwa cama, pajluwa kaja ñaka'ajori, ñakeja kaja mesa, eyá pajluwa lámpara rikamaré penaje. Ilé kaje wayureje richojé.

Palani ruyanajlo nakaje rumakare rijló nakú i'imaká, raú nala'á rijló pajluwa ukapú nañakaré chu. <sup>11</sup>E apú wakajé riphá rejo, rikamátakoloje rikapure chu penaje. <sup>12</sup>E rimá rijwa'até jápajeri, Guehazí rií i'imakajlo:

—Pimicha ilerú, marí pajimila Sunem eyájerujlo, ru'ujnakáloje majó penaje.

Raú ri'ijná ruwá'aje. Ruphaka rejo ee, rimá piño rijwa'até jápajeri Guehazijlo:

<sup>13</sup>—Pimá kelerú inanaru, palájne'ekeru wani i'imakayo wajwa'atejlo, na ka'ajná ruwata wala'aká rojló. Ruwata ka'ajná wapura'akó ruchaya we'emakana wa'até, rila'akáloje rojló nakaje palá. Ruwata kaja ka'ajná wapura'akó ruchaya suráana wakára'ajeri wa'até, rila'akáloje rojló ñaké kaja nakaje palá.

Raú rijwa'ateje kemari rojló ñaké. Raú rumá rijló:

—Unká na nuwátala ila'aká nojló, palá nuká maare nuká'ana wa'até.

<sup>14</sup>Raú ripa'ó Eliseo ejo, rimá rijló:

—Unká na ruwátala wala'aká rojló.

—Eta, ¿na chi wala'ajla rojló?

—Kaapí, unká nuwe'epila. Unká ruyani i'imalá, eyá kaja phíyu'uke wani kaja ruyajná —ke rimaká Eliséojlo.

<sup>15</sup>—Pimicha piño rojló, ru'ujnakáloje majó, nupura'akóloje rujwa'até penaje —ke Eliso kemaká rijló.

Raú ri'ijná piño ruwá'aje. Ruphaka rikapure numaná ejé ee, <sup>16</sup>Eliseo kemari rojló:

—Apú jarechí japi, me'etení kecha ri'imajika wakajé, re pi'irí i'imajé pikapi.

Raú rumá rijló:

—¿Naje pimá nojló nakaje, unká i'imalaje ñaké nojló nakú mapeja? Tupana wa'ateje piká, unká naje kalé pajlá nujwa'até, pijwa'até jápajeyo keja nuká.

<sup>17</sup>Ilé ke napura'akó pajwa'atéchaka. Rejomi apú jarechí e'iyá ru'umá kanupá. Riphaka rená chojé rojló wakajé, ruwa'a ru'urí, Eliseo kemaká rojló i'imaká ke. <sup>18</sup>E ru'urí keño'ó tawá'akajo, ewá kaja rikeño'oká ja'apákaje palá. E pajluwape, yuwají jo'ó

ri'imaká wakajé, ri'ijná rara'apá amaje. Trigo icha ña'ajeño jápaka ejo ri'ijná. <sup>19</sup>Re ri'imá najwa'até, e mana'í chiyó rikeño'ó awíyo'okaje:

—¡Ay, nuwíla'aru! ¡Kewí wani nuwíla'aru chapátaka nuká!  
—ke.

Raú rara'apá kemari rijwa'até jápajerijlo:

—Piwa'a riká raló ejo.

<sup>20</sup>Raú riwa'a riká rejo. Ra'á rojló riká, e ruwa'a riká, ruyá'ata riká rukujujú nakojé. Kaápu'uku ejená riya'o rukujujú nakú, rejéchami ritaka'aká. <sup>21</sup>E rujña'á ritami Eliseo ukapure chojé, rejé roto'otá ritami ricamané chojé. Rejomi rutá palá ukapú numaná, rejomi ruwitúka'a reyá. Ruwa'a ru'urí michú jara'apá maná, ri'ijnakáloje rejo penaje. Riphaka runaku ee, rumá rijló:

—Piwakára'a pajluwa pijwa'até jápajeri nakiyana wá'aka majó pajluwa kawarú, nu'ujnakáloje rinaku Tupana puráka'alo ja'apátajeri Eliseo ejo. Rejomi nupa'ajó piño majó.

E rimá rojló:

<sup>23</sup>—¿Naje chi piwata ramákana chuwa'já? Unká watána'akaje kalé chuwa'já; unká kaja wajé kerí iphala, wa'apátakaloje raú fiesta penaje.

—Piwó ka'aniño nu'ujwa'até —ke rumaká rijló.

<sup>24</sup>Rejomi ruwakára'a nayá'ataka rojló ñáka'ajori kaje kawarú wajlé chojé, rinaku nu'ujnakáloje rejo penaje. E kaja rócho'o richojé yá'ajo, e rumá najwa'até jápajerijlo:

—Chuwa piwa'a wekó pu'ukuja rejo, unká méreje pitajnálajo, a'ajná numájika pijló ejená.

<sup>25</sup>Ilé ke nu'ujnaká, ají ke ya'ajnaje ipuré Carmelo ejo, rewá Tupana puráka'alo ja'apátajeri i'imajikale. Ya'ajná jo'ó ru'umaká ee, Eliseo amá rukeño'ótako majó, raú rimá rijwa'até jápajeri Guehazijlo:

<sup>26</sup>—Piyaka'o, ilerú Sunem eyájeyo waícha. Pi'ijná kiñaja rujimaje, pikeja'a ruliyá nayukuna, pamákaloje mékeka ruká, eyá meke ruyajná, ñaké kaja ne'erí.

Raú ri'ijná rujimaje, ripháka'ako rujwa'até ee, rikeja'a ruliyá piyuke nayukuna.

—Palá waja weká —ke rumaká rijló mapeja.

<sup>27</sup>Rejomi ro'opá ritukumá ipuré ejo, iphayo Eliseo nakú.

Ruphaka rinaku penájaja, rujláma'ako ri'imá nakojé, rumawílo'o riká ritajné nakiyá. Raú Guehazí i'ijnari rowa'ajé, rika'akáloje ruká ritajné nakiyá, e'iyonaja Eliseo kemari rijló:

—Reja ru'umareja, kamu'ují wani rupechu. Unká jo'ó Tupana kemalá nojló naka la'arí ñaké rupechu rojló.

<sup>28</sup>Kaja ewaja rumá rijló:

—Unká numalá pijló i'imaká, pa'akáloje nojló pajluwa yuwají penaje. Numá pijló i'imaká: Unká naje kalé pipajlá nujwa'até, ke.

<sup>29</sup>Raú Eliseo kemari rijwa'até jápajerijlo:

—Pilamá'ato, pi'ijnakáloje rejo penaje. Eko pijña'á nukutiware pijwa'ató, pu'ukuja pi'ijnajika rejo. Pipháka'ajiko ee ka'ajná na wa'até, unká pajalákalaje riká. Rajalákajika ee ka'ajná piká, unká pa'ajipalaje rijló. Piphájika ru'urí tami ejo ee, pito'otaje nukutiware rijimami chaje.

<sup>30</sup>E'iyonaja ralomi kemayo rijló:

—Tupana íí aú numá pijló, ñakeja kaja numájika pijló rinaku pijimaya: Unká nupa'alajo nuñakaré ejo nokó, a'ajná pi'ijnajika nujwa'até rejo ejená.

Raú ri'ijná rujwa'até. <sup>31</sup>Guehazí i'ijnari maapami ke natukumá. Riphaka támijimi i'imaká ejo ee, rito'otajla rijimami chaje Eliseo kutiware, e'iyonaja unká riwajala ripéchuwa. Raú ripa'ó piño riyámojo, ripháka'akoloje najwa'até penaje. Ripháka'ako najwa'até ee, rimá Eliséojlo:

—Unká yuwají michú wajala ripéchuwa pikutiware aú.

<sup>32</sup>E na'apá rejo, iphaño ruñakaré ejé. E Eliseo mujlúka'a rikapure chojé, amari yuwají michú tami to'okó ricamané chu. Kaja maapami ke ritaka'aká michú. <sup>33</sup>Raú ritá rikapure numaná. Unká na apú i'imalá re rijwa'até rikapure chu, rikaja kalé yuwají michú tami i'imari re. E ripura'ó Tupana wa'até. <sup>34</sup>Rejomi rácho'o, piyuke rapára'ataka rinapónami rinapona aú. Rinumami loko'opani kaja rinuma i'imari, eyá ñaké kaja rijlú i'imaká rijlumi loko'opani kaja, eyá riyáthe'elami chaje rito'otá kaja riyáthe'ela. Kaja piyuke rapára'ataka rinapónami rinapona aú, raú ima'á kemachi rinapónami la'akó. <sup>35</sup>Eliseo jácho'oro ritami chaya meketánaja, richira'ó meketánaja ukapú chuwá, rejomi rito'ó piño ritami cha. E mana'í chiyó yuwají tami a'achiñari iyamá kuwá'ata ke pe, rejéchami rijme'etaka rijluwa. <sup>36</sup>E Eliseo kemari Guehazijlo:

—Pimicha ralojlo, ru'ujnakáloje majó.

Raú ri'ijná rojló kemaje. Iphayo Eliseo nakú, e rimá rojló:

—Marí pi'irí.

Raú rujláma'o ri'imá nakojé, rejomi nácho'o ukapú chiyá ru'urí wa'até.

### Eliseo tejmo'ótaka Naamán yukuna marí

**5** <sup>1</sup>Naamán, pajluwaja ina'uké, Siria eyájena suráana wakára'ajeri íf i'imaká. Palá wani riká pajimila eyá wakára'ajeri pechu i'imajika rinaku. Palá Tupana a'ajíkale riñathé, richá'atakeno kajrú ajopana te'eré eyájena, ajopana te'eré eyájena ke, nenókajiko kewá pajwa'atéchaka. E'iyonaja unká peyajwé kalé ri'imajika, ritami ri'imajíkale, rinapona nakiyá patáka'atajikole rijló.

<sup>2</sup>Júpimi ke Siria eyájena iphaka mana'í chiyó Israel michú lakénami nakú najwa'até nókajo. Riwakajé nachá'ata ne'emaká, rejomi najña'atá najluwa kajrú nanánemi reyá. Nawa'a kaja najwa'ató ina'ukena nakiyana reyá. Riwakajé Naamán wá'ari pajluwájaru yuwaló rijwa'ató ne'iyayá, rujápakaloje riñakaré chu riyani jalojlo. <sup>3</sup>Ruká japakeyo najló re, e apú wakajé rumá rukariwáterujlo:

—Nukariwate i'ijnakela Tupana puráka'alo ja'apátajeri, Samaria te'eré e i'imakare amaje, ra'apátajla riyaripune riliyá, ri'imakáloje peyajweni reyá a'ajná ño'ojó —ke rumaká rojló.

Riká yukuna riyani jaló i'imá rijló. <sup>4</sup>Rejomi ri'ijná ne'emakánajlo riyukuna i'imajé, richaya rikejá'akaloje rikó riliyá, riyuríkaloje ri'ijnaká Samaria ejo. <sup>5</sup>Ri'imá rijló riyukuna, raú Siria eyájena i'imakana kemari rijló:

—Palani, pi'ijná rejo. Nuwakára'aje kaja pijwa'até puráka'aloji lana'akéjami Israel te'eré eyájena i'imakánajlo.

Ra'á rijló puráka'aloji lana'akéjami, rejomi ri'ijná rejo. Kajrú wani rijña'aká rijwa'ató liñeru rejo: treinta mil monedas plata nakiyá la'akanami waja, ñaké kaja rijña'aká seis mil monedas, oro nakiyá la'akanami wani. Ñaké kaja rijña'aká rijwa'ató a'arumakaji rejo, iyamá thé'ela kele ina'ukejlo ke ñó'opeka penaje ri'imaká. Ilé kaje wa'até ri'ijná rejo.

<sup>6</sup>Kaja ewaja riphá Israel eyájena i'imakana nakú. Ra'á rijló puráka'aloji lana'akéjami, ne'emakana wakára'akare rijló. Riká puráka'aloji rilana'akare kemari: “Marí papera kaje la'akéjami pamájika aú, piwe'epeje nuwakára'aka pichaje Naamán. Nule'ejena suráana wakára'ajeri nakiyana riká. Rinapona nakiyana patáka'ataro rijló, ñakele nuwata pa'apátaka riliyá riyaripune”, ke rilana'aká rijló.

<sup>7</sup>Israel te'eré eyájena i'imakana amaka aú mékeka papera kaje lana'akéjami kemaká, rijiyo'otá ra'arumaká rinaku i'imakare, ripechu kechíra'akole wani rijló. E rimá ra'apiyatéjenajlo:

—¿Na penaje chi rimá nojló, nutejmo'ótakaloje riká?  
Unká Tupana kalé nuká, no'okáloje ina'ukejlo kajmuchaji, eyá nuka'akáloje kaja naliyá riká penaje. Rikulákatako ta nunaku, rijimaje rakha'ákaloje numaná penaje.

<sup>8</sup>Ilé ke ne'emakana jiy'o'taka ra'arumaká yukuna iphari Eliseo nakú, raú riwakára'a puráka'aloji ne'emakánajlo marí ke: “Unká na penaje kalé pijiy'o'tá pa'arumaká. Piwakára'a ilé iphari pinaku ja'apaka majó nuchaje, riwe'epíkaloje raú re jo'ó kaja jo'ó Tupana puráka'alo ja'apátajeri Israel te'eré nakú”, ke rimaká rinaku.

<sup>9</sup>Raú ne'emakana kemari rijló, ra'apákaloje rejo penaje. Raú ra'apá rejo; pe'iyowa ja'apaka chu ri'ijná rejo piyuke rikawarútena wa'até. Kaja ewaja riphá Eliseo ñakaré i'imaká ejo, raú ritajno rejé rinumaná awa'ajé. <sup>10</sup>E'iyonaja unká Eliseo mujlúka'ala rajalákaje. Riwakára'a pajluwaja i'ijnaká ripuráka'alo yukuna i'imajé rijló, rimakáloje rijló marí ke: “Nukariwate kemíchari pinaku, pi'ijnakáloje juni Jordán ejo. Rejo piphájika ee, piwitúka'aje rakojé, iyamá kuwá'ata ke pe pajmurájiko rakojé. Rejéchami pinapona pala'ajiko pijló”, ke rimíchaka pinaku.

<sup>11</sup>Ilé ke Naamán jema'aká rimaká rijló aú, kajrú wani riyúcha'ako. Ra'apá reyá, e rimá rijwa'até i'imakáñojlo:

<sup>12</sup>—Kajrú juni palá nojé wate'eré Damasco ewá. Re juni Abaná, eyá apú Farfar, riká juni palá nojé, maárowa i'imakare juni ta chaje palaka. Rakojé nojmúrojla, nuyaripune ja'apákaloje nunakiyá penaje.

<sup>13</sup>E'iyonaja rijwa'até jápajeño i'ijnaño rawa'ajé, nemá rijló:

—Wawakára'ajeri, Tupana puráka'alo ja'apátajeri kemíchakela pijló, pila'akáloje nakaje puwichani penaje, pila'ajla riká wawe'epika. Ñakele pila'aja rimíchaka pijló i'imichaka ke. Pajmúricho rakojé, piyaripune ja'apákaloje piliyá penaje.

<sup>14</sup>Rema'á na'apiyá, raú ri'ijná juni Jordán turenaje. Riwitúka'a rakojé, e iyamá kuwá'ata ke pe rajmurako rakojé, Tupana puráka'alo ja'apátajeri wakára'aka rila'aká ke. Rejéchami rinapona pala'akó rijló palá; palá rima yuriko piño yuwají ima ke. <sup>15</sup>Raú ripa'ó piño rijwa'até i'ijnakaño wa'até Eliseo ñakaré ejo. Riphá rinaku, e rimá rijló:

—Chuwa nuwe'epí kewaka unká chi'inárikanaji i'imalá ajopana ina'ukena te'eré nakú, maare Israel te'eré nakuja kalé re kewaka iná chi'inárikana. Ñakele numá pijló: pijña'á nuliya nakaje nuwátakare a'akana pijló mapeja, pijwa'até jápajeri keja nuká.

<sup>16</sup>E'iyonaja Eliseo kemari rijló:



—Tupana, amari weká palá me'etení íí aú numá pijló: unká nujña'alaje piliyá nakaje piwátakare a'akana nojló.

Mawó Naamán kemakajla rijló, rijña'akáloje riliyá nakaje penaje, e'iyonaja unká na rijña'alá riliyá. <sup>17</sup>E rimá rijló:

—Kaja unká piwátala no'opiyá nakaje ña'akana, ñakele numá pijló, piyuríkaloje nujña'aká te'erí maare eyá, Israel te'eré nakiyá, iyamá kawaruna janapika ke ñó'opeka. Eyá chuwa kaja unká wani nukára'atalaje piño nupirana nakiyana apú chi'inárikanajijlo. Tupánajloja nukára'ataje chuwa neká. <sup>18</sup>Pajluwa nakaje liyaja kalé nuwata Tupana amako nuchaje: nu'ujnajika kewá we'emakana wa'até Rimón ñakaré ejo, rila'akáloje pu'ují ripéchuwa Rimón, Siria chi'inárikanajlo, riwakára'aje nutára'ako nu'urúpachi aú renami jimaje. Riliyá kalé nuwata Tupana amako nuchaje, nula'ajíkale ñaké kaja rijwa'até.

<sup>19</sup>Eliseo kemari rijló:

—Pipa'ó mana'ija.

Raú ripa'ó reyá. Kaja ya'ajicha ri'imaká, <sup>20</sup>e meketana i'imajemi Eliseo wa'até jápajeri Guehazí pechu i'imá: “Kajrú wani ilé Siria eyaje Naamán ña'aká majó nakaje nukariwátejlo, e'iyonaja unká na rijña'alá riliyá. Ñakele Tupana ijlu chuwa ke nu'ujichaka kiñaja rápumichu, nuphátakaloje riká penaje. Apala ra'ajé nojló nakaje nakiyana”, ke ripechu i'imaká.

<sup>21</sup>Raú ri'ijná rápumichu. E Naamán amari rikeño'ótako nápumichu, raú ritajno. Riwitúka'a pe'iyowa ja'apaka chiyá, re riwata riká. Riphaka rinaku ee, rimá rijló:

—¿E chi nakaje unká paala, pi'ijnale majó wápumi chu?

<sup>22</sup>—Unká —ke rimaká rijló—. Nukariwate wakári'ichari nuká majó, numakáloje pijló: Wajé iyamá walijímakana iphíchaka wanaku ipuré Efraín eyá. Tupana puráka'alo ja'apátajeño kaja neká, ñakele riwata pa'aká najló pinane nakiyana: tres mil monedas, plata nakiyá la'akanami waja, eyá ñaké kaja a'arumakaji apujlo, apujlo.

<sup>23</sup>Naamán kemari rijló:

—Ñaké riká, no'ojé pijló seis mil monedas.

Wechi riwátaka rijló ra'akana, e ritamáka'ata liñeru iyamá tula chojé pu'utheno. Rijña'a kaja rinane e'iyayá a'arumakaji iyamá ina'ukénajlo penaje. Rejomi ra'a riká iyamá rijwa'até jápajeñojlo, ne'ejnatákalaje riká Eliseo ñakaré ejo. E kaja Guehazí pa'aró. Naamán wa'até jápajeño ja'apaño ritukumá. <sup>24</sup>Nephá yenuri ejo, Eliseo ñakaré i'imaká ejo. E Guehazí ña'arí naliyá iyamá tula, liñerú i'imakare chu, a'arumakaji wa'até. Riñakaré chojé ripitá

riká, rejomi riwakára'a Naamán wa'até jápajeño pa'akó. <sup>25</sup>Rejomi ri'ijná rikariwate amaje, e Eliseo kemari rijló:

—¿Mere pi'imichá?

—Unká méño'ojo nu'umalacha, maáreja nuká.

<sup>26</sup>Raú Eliseo kemari rijló:

—Riwitúk'ichaka aú pe'iyowa ja'apaka chiyá piwátaje, re kaja nupechu i'imichá pijwa'até. Unká riphálacha rená chojé pijló, pijña'akáloje pijluwa liñeru, a'arumakaji, kaje maká. Unká kaja riphálacha rená chojé pijló, piwarúwa'akaloje pijluwa namena, ovéjana, jémana pirakana, pijwa'até jápajeño, kele. <sup>27</sup>Chuwata Naamán yaripúnemi ja'apájika pinakojé. Rinaku pi'imajé pitami, ñaké kaja ri'imajika piyánijlo, pilakénamijlo matajnako.

Raú Guehazí ja'apari reyá, wa'até ke rima patáka'atako rijló. Jarephí wani rima la'akó raú piyuke.